

Negeri Sembilan pilihan pelabur



Aminuddin menyampaikan ucapan sempena Hari Keputeraan ke-77 Yang di-Pertuan Besar Negeri Sembilan di Istana Besar Seri Menanti pada Selasa.

RM3.0 bilion pelaburan
direkodkan pada
suku kedua 2024

Oleh **NORAFIDAH ASSAN**
KUALA PILAH

Negeri Sembilan terus menjadi pilihan pelabur, dengan kerajaan negeri giat untuk meneruskan libat urus bersama pelabur-pelabur berpotensi, sama ada dari dalam mahupun luar negara.

Menteri Besar, Datuk Seri Aminuddin Harun berkata, hasilnya, Malaysia Investment Development Authority (MIDA) melaporkan pada 2023, Negeri Sembilan berjaya mencatatkan rekod pelaburan tertinggi iaitu sebanyak RM10.1 bilion.

"Sehingga suku kedua tahun 2024, sebanyak RM3.0 bilion pelaburan telah direkodkan dan kita

optimis akan menyamai rekod pelaburan tahun lalu.

"Negeri Sembilan akan terus meningkatkan lagi daya saing ekonomi dan Keluaran Dalam Negeri Kasar (KDNG) secara mampan serta inklusif dengan memberi tumpuan kepada beberapa sektor utama berpotensi untuk merancakkan pertumbuhan ekonomi negeri," katanya.

Beliau berkata demikian ketika sembah ucapan tahniah dan taat setia sempena Hari Keputeraan ke-77 Yang di-Pertuan Besar Negeri Sembilan, Tuanku Muhriz Tuanku Munawir di Istana Besar Seri Menanti di sini pada Selasa.

Menurut Aminuddin, gelora ekonomi dunia melalui prakarsa baharu mampan, diperkukuh melalui Majlis Pelaburan Negara yang bersidang pada 16 Oktober 2024 yang meluluskan inisiatif Pembangunan Kluster Industri Wilayah Tengah, merangkumi Negeri Sembilan, Selangor, Melaka dan Kuala Lumpur.

"Inisiatif ini bagi mewujudkan

identiti kluster industri khusus dalam sektor pembuatan melalui usaha sama dan sinergi kolaborasi antara negeri dalam memacu pelaburan bersasar.

"Usaha ini juga sejajar dengan agenda diterapkan dalam New Industrial Master Plan (NIMP) 2030 yang memberi fokus kepada pembangunan ekonomi rentas sempadan melibatkan Bandar Enstek dan Nilai," katanya.

Jelas beliau, kerajaan negeri juga sepakat menyokong cadangan jaringan lebuhraya baharu melibatkan Lebuhraya Senawang - KLIA (SKLIA) dan sambungan Lebuhraya West Coast Expressway (WCE) menghubungkan Banting, Selangor merentasi Negeri Sembilan serta Melaka hingga ke Gelang Patah, Johor.

"Patik percaya jajaran WCE sepanjang pantai Port Dickson akan memberi limpahan ekonomi dan pembangunan kepada rakyat di Negeri Sembilan," katanya.